

DISCOURS DO TROUV'LE 2018

Mossieû Bastin, chér Borgumêsse,
Ruv'là c'one fî l'timps po l'Trouv'lê
Du ruduv'ni d'Mâm'dî lu mêsse,
Mès djusse lu timps d'nosse bê Cwarmê !

Dju saluw'rè po-z-atakî,
Duvins cisse sâle, lès djins d'Mâm'dî,
Tos cès k'on loume lès « nés-natifs »,
Èt même lès novês, c'est « kif-kif » !

Tant mî po nosse linguèdje walon
K'on pinsève vèye mori po d'bon,
C'est grâce à lu, èt c'est tant mî,
K'nos traditions s'pwartèt p'on mî !

Dju saluw'rè, p'one fî à fé,
Lès prezidants d'nos sôciyétés,
Lès novês, mès surtout l's-anciyins,
Ca 'n'a avou dès mâyes candj'mints !

A l'Malmédiène èt à l'Mèsnie,
A l'Frat' èt à l'Echo, lès vîs.
Voss' Trouv'lê v'lève djuss' vu r'merci
D'aveûr fê crêhe nosse paradis !

On pout m'raconter çou k'on vout,
Mès l'ont ovré, tos cès houltrous,
Po wèrande todi bin hôt,
Lès coleûrs du nosse bê drapô.

Èt à l'Ûnion, nosse bon Carlô,
Èst co bin l'seûl k'a tuni l'côp.
C'est k'i n'v'lêt nin candjî d'coleûr
Po l' « Dècorama » : on mâleûr !

Dès gris, c'esteût l'anivèrsêre :
Proféciat à tos vos tchanteûrs !
Vos k'estoz co, sins 'n'aveûr l'êr
Do l'Bèljike, lu pus vî dès keûrs !

Dju k'cist'âné a passé vite !
Même nin l'timps d'sognî m'vas'-è-vite !
I n'a du cwè su dumander,
Si 'n'a doze meûs d'vins one âné !

Sav' bin ku do Trouvlê, l'mèstî,
N'èst nin afêre todi èhî :
Fât chake ané su runov'ler
Duvins l'discoûrs, sins s'rèpèter...

Ça fêt dès meûs ku dju n'dwame pus,
O l'tièsse, one tchanson nu m'cwite pus.
Èt dju va v's-u l'tchanter asteûre,
Ca i m'fât cwand même fé oneûr
À l'novèle Dirèctrice dès Tènes!
Âye, vos-ave bin oyou, môrdjène !
One tène rossète ki n'èst nin lêde
Ki sé c'mint fé po k'on s'ètinde !

Houtoz pu vit' ci p'tit drole d'êr :
*« I fêt tranquîle, lu cî èst bê,
O l'mâhon d'vèye i n'su passe rin !*

Fât creûre k'do l'vèye, nos r'prézintants
N'ont nin 'stus dès pus valiants :
Nin on dispute, nin one margaye,
Nin on seûl k'a miné bataye !

Mès, tot tûzant, asteûre dju sé,
Parèt k'on r'vôtrèt cist'ané !
I f'zève si keût, c'èst po çoula !
Nouk nu voléve piède sès cadas !

Po nosse Mayeûr, lu seûl mwayin
Du rèsrontrer l'concitwayin,
Ça s'tu du r'çûre dès pétitions,
Ou dès marièdjès, fé l'réception.

Portant, on divôrce d'zos l'porotche,
Inte Bleûs, Vèrts, l' s-Oranjes ou lès Rodjes,
Areût spécî l'vèye dol cité
Èt fê k'on-z-âhe du cwè k'djâzer !

Dju m'èsplike :

L'Ersèl, des Oranges, divôrc'rêut
Po su marier avou lès bleûs ;
L'majôrité vol'reût o l'êr,
Noss' Jan-Pol sèreût lu bambêrt
Èt bascul'reût dol ôte costé!
Ersèl s'reût Mayeûr do l'cité !

Po l'discoûrs walon do Cwarmê,
V's-arîz oyou one sacwè d'bê :
L'André sayève du fé p'on mî,
Po çoula l'avève du kî t'ni !

Et noss' Djan-Pol, dju n' v's-aprind rin,
Fêt çou k'i pout, mès ça n'va nin !
Dju v's djure k'on-z-areût avou bon
Ôre Ersèl mî mêstri l'walon !

Candjant d'sudjèt, i vât co mî,
Ca dju m'f'reû co bin apiçî...
Ruv'nant pus vite à l'impôrtant,
Nosse bê folklôre d'i n'a mèye ans.
Bin pus vî ku l'divôrce, lès vîs,
Inte lès-abbis d'Stâv'leû – Mâm'dî.

Mès i m'sonle ku ci vî marièdje
N'èst nin tot-à-fêt consomé !
Dju veû dès signes du raplakèdje.
Inte nos deûs bones vîhès cités !

Lu prumî proûve, èt c'è-st-one veûre,
C'èst ku, du Stâv'leû, lu Mayeûr
Du s'posse voléve dèmissioner,
Il a fêt là, çou ki p'léve fé... !

I va v'ni vikî à Mâm'dî
Po drovi on bê grand poyî,
Ca l'a trové, l'co du Stâv'leû,
Co n' fî on mwayin malicieûs
D'aveûr dès-oûs à l'fin d'l'èsté
À fé bèni par Sinte Béné !
C'èst mî d'èsse Grand Mêsse dol Om'lète
K'on Mayeûr du Stâv'leû ki s'piède !

Lu « sorîre » ! V'là k'on signe du pus'
Du rac'môdêdje, Sint nom di huss'.
One manôye ûnike po l'rèjion,
Ki va du Wémes djusk'à Stoumont,
Avou Vî-Sâm', Treûs-Ponts, Lièrneû,
Sins rouvî Mâm'dî èt Stâv'leû !

One grande idé d'nos comérçants
Po fé rintre o l'casse, dès çans ;
Mès po lâncî cist'èven'mint,
L'âriz mî fêt d'èsse pus malins !

Dju r'veû co ciss' publicité,
Là, po l' « casting », fâret r'passer :
So l'grande foto d'vins lès gazètes,
Nin méme one bèle pitite wihète.
Djusse vos, Mâyeûr, avou l'Alin,
Avou on grand bilèt o l'min !
L'arî po l'mons p'lou prinde dès djins,
Ki soriyètnaturel'mint...

Si vos v'lîz fé roter l'hastik,
Mi dj'âreûs pris one vrâye comike,
L'Erika ki, l'djoûr do martchî,
Fêt du s'sorîre on vrâye mèsî !

Lu djèrène proûve, adon dj'arète ;
Ca v's-aloz piède totes vos hozètes :

Dj'a r'pinsé à bon Sint R'mâke, ki,
D'Mâm'dî a v'ni basti l'abi :
Volant co rinde d'ôtes djins ureûs,
Il a méme invanté Stavl'eû.

I n'a kék'meûs, nos Mâm'diyins
Ont co sâvé lès Stâv'lotins,
Po l'fin dol Laetare d'esté,
Fûzant proûve d'one tote grande bonté !

Mâmd'î a èstu bon Sègneûr,
Tot-z-èvoyant l'ome à l'hôteûr,
Po dêpaner l'Emulâtion :
Sins porte-drapô, l'èstî l'coyon !

On missionêre, faléve trover,
Got' alèrjike â rodje è blanc,
Coleûrs d'on blânc-moussî-èfant !
Ca on sé k'cwand lès vîs sont plins,
Leû grand né, côleur du Sclessin,
Tire so l'mâv'lète ! Là, ça n'va nin !

L'ecsplorateûr a 'stu trové :
Du tos lès Tènes, lu pus cwaré,
Drovant l'cortége, come à l'armé,
L'a fêt su role avou fîrté !

Stâv'lotins, n'sèyoze nin surpris
Si d'vins one père d'ânés, m'sonle-t-i,
V's veûroz djower so vos pavés,
Dès djônes crolés à l'tièsse cwârê !

Assez djâzé d'divôrce, mès djins,
Dju veû ku v's-ave lu lèwe ki pind !
Aloz bin vite mète à l'oneûr
Çou ki bastihe lu bone umeûr,
C'èst l'marièdje du kék's ingrédijins :
L'amitié, l'djôye èt l'amûz'mint !

Profitez bin du cès cwat' djoûrs
Èt drovoz à tot l'monde vosse coûr !
Sèyoze fîrs èt todi onièsses,
Mès n'rouviyoze nin du bin fé l'fièsse !

Mu chère Mayeur, vos p'loz 'nn'aler
Po dès vacances bin mérités.
Merci d'm'aveur confié l'panûle.
Noule hisse ! Dju l'mètre à l'avrûle
Et vu l'rindrèt ci mècrèdi,
Cwand l'bataclan sèrèt fini !

D'avant du v's-cwiter, mès bonès djins
One tote djèrène ruc'mandâcion :

Cwand v'mètroz l'feû, mârdi, Bon Dju,
Dumèsfiyoz v's k'i-n sofèle pus
Ca, come à Binche, v's porîz r'grèter
Du vèye lu mâhon d'vèye broûler !

Surtout k'dol vèye, nos bons pompiers,
Fê mâlêhî du lès trover :
Cwand ç'n'est nin lu grève ki fuzèt
Sont à Hofrê, à c'ki parèt !
Po dustinde lu tot grand tchèm'nî
K'avève èstu monté coûkî,
Par dès hofurlins ingénieurs,
Ki n'sont gote du tout à l'hôteur !

Asteûre dju m'tê, place à « Maestro » !
Ki va fé rèsbondi bin hôt
Lès kékès notes dol Olivier
Ki vont û nos fé fruziner !

Vive tos nos-ôtes èt mémes les-ôtes
Du nosse Cwarmê, tos lès-apôtes.
Vive nos d'guîzés èt vive Mâm'dî,
Lu pus bèle cwane do l'Walonî !

Pol l'Malmédiène,

Lu 10 do meûs d' fèvrîr do l'an 2018.

Robert DEHEZ